

主編 湯重南

(第十八冊)

日本史籍善本合刊兩種

大日本史
日本野史

綫裝書局

日本史籍善本合刊兩種

大
日
本
史

(本卷四十二冊)

第十八冊

卷二百三十二	列傳第一百五十九	外國一	三
卷二百三十三	列傳第一百六十	外國二	五七
卷二百三十四	列傳第一百六十一	外國三	八七
卷二百三十五	列傳第一百六十二	外國四	一三七
卷二百三十六	列傳第一百六十三	外國五	一八一
卷二百三十七	列傳第一百六十四	外國六	二二三
卷二百三十八	列傳第一百六十五	外國七	二六九
卷二百三十九	列傳第一百六十六	外國八	三〇七
卷二百四十	列傳第一百六十七	外國九	三三三
卷二百四十一	列傳第一百六十八	外國十	三八一

卷二百四十二 列傳第一百六十九 外國十一 四一一

卷二百四十三 列傳第一百七十 外國十二 四三九

跋 四八一

大日本史

九十六

第二百三十二卷 外國列傳

隋 唐

第二百三十三卷 外國列傳

宋 元 明

大日本史卷之二百三十二

列傳第一百五十九

權中納言從三位源光圀 修

男權中納言從三位綱條 校

玄孫權中納言從三位治保重校

外國一

隋

唐

天地所覆載、日月所照臨、四海萬國、綦布星

羅、民生其間者、萬類千種、其殊風異俗、不可
遍舉悉識、惟文軌之所通、載籍之所存、其國
俗物產、世代變革、可得而考焉、其最大者爲
隋、地廣人多、自上古聖賢之君、法天爲治、以
道德仁義化導其民、典章制度大備、下及近
古、而其禮儀文物、人材財用、亦非諸國之可
比、其國自隋以前、秦漢之裔、雖有歸化者、而
未聞有通使者、而彼史紀我風土物俗、虛實
相半、至如載朝貢封爵等之事、則古今所無、

蓋當時置府於任那、分帥臣鎮制之、時高麗雖稱臣朝貢、而亦世奉彼正朔、受彼封爵、意爲任那帥臣者、亦從而受其封號乎、抑鎮西奸民、以商貨往來者、假名朝使、稱貢調、受封爵、以爲射利之資、而彼史從而錄之乎、要皆不足以取信、而其實通使者、則自推古帝朝始矣、自後使聘往來、史不絕書、此不可以不錄也、其他諸蕃服叛不一、鴻荒之世、素盞鳴尊往來韓地、其後不通、崇神帝朝任那人朝

貢自是來者日多矣、仲哀帝九年、神功皇后
征新羅、赦其王爲飼部、方此時也、其旁高句
麗、百濟一時降附、請爲西蕃、廷議因定內官
家、任那之府、以統制三韓、其後肅慎、渤海亦
慕化來歸、大凡諸國使聘之來、其納款輸誠
者、懷柔綏撫、書辭無禮者、自太宰府放還、或
姦僞往來者、責以信義絕之、舍逆取順之道
也、蝦夷僻居東北、屢寇邊陲、自日本武尊東
伐、懷化歸命、然其俗麤獷、動致騷擾、置鎮狄

征夷之職、禁跳梁、備暴發、歸化內嚮者、廼處
于一方、遂其性、不令獲喧擾、若夫女真蒙古、
恃疆寇邊、則摧陷廓清、不旋踵就戮、不得恣
其毒螫、嗚呼神聖柔遠之制、膺懲之意、由是
可睹矣、今其載籍可徵者、竝列作傳、其餘如
流寓漂至者、亦從而附之云、

隋國在筑紫西、自隋以前、其國號數變、其文
字之可得紀者、自唐虞始、唐堯有聖德、號陶
唐氏、既老讓舜、舜克熙堯之載、號有虞氏、舜

讓禹、號夏后氏、傳世十七、桀淫驕、商湯放之、
代立、都于亳、仍號商、盤庚徙于殷、故亦號殷、
殷紂湛湎、諸侯不享、周文王昌修德、民歸周、
武王發伐殷代之、子孫昏亂、戎狄侵之、平王
宜臼遷洛、是爲東周、東周惠王閔十七年、當
神武帝元年云、周道陵遲、嬴秦滅之、二世而
民叛、劉季立爲天子、都長安、是爲漢高祖、傳
世十四、其臣王莽篡立、號新室、漢宗室劉秀
夷羣賊、復漢祚、是爲光武帝、亦十四主、曹丕

篡之、都許、國號魏、劉備卽位于成都、亦號漢、
孫權據武昌稱吳、漢二主、爲魏所滅、魏五主、
司馬炎代之、是爲晉武帝、都洛陽、孫氏有吳、
四世、晉又取之、五胡猾晉、司馬氏遂不振、遷
都於建康、拓跋珪起於鮮卑、建都於平城、號
北魏、於是分爲南北、司馬氏傳世十三、劉裕
代之、是爲宋武帝、凡八主、蕭道成滅之、號南
齊、爲蕭衍所滅、蕭衍改國號梁、凡四主、陳霸
先滅之、國號陳、拓跋氏有國一百四十九年、

魏分爲東西、寶炬都長安、是爲西魏文帝、善見都鄴、是爲東魏孝靜帝、東魏傳國於高洋、號齊、凡六主、爲宇文覺所滅、宇文覺改國號周、周五主、讓位於隋王楊堅、參取西土歷代史傳楊堅事周爲相國、封隋王、遂受周之禪、卽帝位、因本封國號隋、改元開皇、是歲敏達帝十年辛丑歲也、開皇九年滅陳、併其地、總州三十、郡一百、縣四百、至是南北混一、在位二十四年殂、是爲高祖、太子廣立、改元大業、隋書實推古

帝十三年也、十五年秋詔使大禮小野妹子

聘于隋、鞍作福利爲通事、

日本紀

贈隋主書、其

略曰、日出處天子、致書日沒處天子、無恙、

善隣

國寶記、

十六年夏隋主使鴻臚寺掌客裴世

清等來聘、築使邸於難波高麗館上、以飾船

三十艘、飾騎七十五匹、迎勞、裴世清等造闕

再拜、獻國書信物於庭、其書曰、皇帝問倭皇、

使人長吏大禮蘇因高等至、具懷、朕欽承寶

命、臨御區宇、思弘德化、覃被含靈、愛育之情、

無隔遐邇、知皇介居海表、撫寧民庶、境內安樂、風俗融和、深氣至誠、遠修朝貢、丹款之美、朕有嘉焉、稍暄此如常也、故遣鴻臚寺掌客裴世清等、稍宣往意、并送物如別、宴世清等於朝、日本紀帝問皇太子曰、書辭如何、太子曰、賜諸侯書式也、然曰皇、曰帝、其義一矣、彼之書用皇字、宜答書以報也、帝從之、聖德太子傳太子親艸書曰、東天皇敬白西皇帝、使人鴻臚寺掌客裴世清等至、久憶方解、李秋薄冷、尊

何如、想清愈、此卽如常、今大禮蘇因高、大禮
乎那利等往、謹白不具、又使小野妹子爲大
使、難波雄成爲小使、鞍作福利爲通事、學生
倭漢福因、柰羅譯語惠明、高向玄理等八人、
送世清等、明年秋妹子還、鞍作福利留而不
歸、蘇因高卽妹子、乎那利卽雄成也、二十二年遣犬上御田
鍬、矢田部造、聘于隋、明年犬上御田鍬等還
自隋、日本紀二十五年隋主廣爲其臣宇文化
及所弑、是爲煬帝、孫侑立、禪位於唐公李淵、